



Prosperitet i kvalitet života u Brčkom vezani su za rast privatnog sektora

Stalni napredak u razvoju infrastrukture, usvajanje zakona kojima se nameće transparentnost u upravljanju, te širenje inicijativa za borbu protiv korupcije privući će poslovne investicije u Distrikt i stvoriti dobra radna mjesta u privatnom sektoru. Rast privatnog sektora bit će okosnica oporavka Brčkog od pandemije i proteklih godina stagnacije, izjavio je u utorak supervizor za Brčko Michael Scanlan. Supervizor je putem Zoom aplikacije razgovarao sa gradonačelnikom Distrikta, zamjenikom gradonačelnika, predsjednikom Skupštine Distrikta i njegovim zamjenikom, zvaničnicima Privredne komore Distrikta, predstavnicom "STUDEN & CO Holdinga", te šefom brčanskog ureda Centra za uklanjanje mina u BiH.

Dobra radna mjesta u privatnom sektoru osigurat će pouzdane prihode stotinama porodica. Također će povećati doprinose u penziji i zdravstveni fond, kao i opću potrošnju, što znači više posla za mala preduzeća i više poreskih prihoda za Distrikt.

U tom pogledu, supervizor je pohvalio odluku vlasti Distrikta da održavaju mjesecne sastanke sa Privrednom komorom Distrikta i Udruženjem poslodavaca, te konstatirao da organi vlasti i poslovna zajednica trebaju blisko sarađivati kako bi se stvorili optimalni uslovi za razvoj privatnog sektora u Distriktu.

Još jedna pozitivna stvar na horizontu jeste i očekivana investicija od 20 miliona KM koja će stvoriti 220 radnih mesta u novoj poslovnoj zoni Brod u sklopu javno-privatne inicijative koju su pokrenuli Vlada Distrikta i „STUDEN & CO Holding“. Memorandum koji je potpisani u okviru ove inicijative predviđa investiciju u Brodu kao prvi korak u desetogodišnjem investicijskom planu vrijednom 500 miliona KM koji bi trebao stvoriti 4000 radnih mesta u više sektora. Supervizor pozdravlja ovu inicijativu kao dio širih napora da se poboljša poslovno okruženje i privuku drugi investitori, kako strani tako i domaći, da posluju u Brčkom.

Širenje prilika za zapošljavanje u privatnom sektoru također će olakšati napore koje Distrikt ulaže na racionalizaciji velike i skupe javne uprave, jer će se ljudima pružiti druge opcije za zapošljavanje koje trenutno ne postoje u Distriktu. Ovo će, zajedno sa širenjem usluga e-uprave, omogućiti da se još više budžetskih sredstava prebací na kapitalne investicije od kojih će koristi imati cijela zajednica i jačati održiv ekonomski rast, podvukao je supervizor.

Također, pojačan fokus organa Distrikta na aktivnosti uklanjanja mina u partnerstvu sa donatorima i pod nadzorom Centra za uklanjanje mina u BiH ne samo da će doprinijeti općoj sigurnosti nego će stvoriti i povoljne uslove za razvoj turizma i izgradnju ključnih transportnih pravaca prema vanjskim tržištima. Turizam, transport i

poljoprivredno-prehrambena industrija su sektori u kojima Brčko može iskoristiti svoj izuzetni geografski položaj, bogato naslijeđe, te izdašne poljoprivredne i prirodne resurse za razvoj ekonomije i unapređenje kvaliteta života za sve koji žive u Distriktu, dodao je supervizor.

Supevizor i dalje poziva sve stanovnike Distrikta da se pridržavaju epidemioloških mjera čiji je cilj osigurati javno zdravlje i sigurnost, dok istovremeno ostaju angažirani na siguran način u važnom poslu koji će omogućiti da se Brčko može brzo oporaviti i odlučno krenuti naprijed kada se situacija sa pandemijom poboljša.